



Vischnaunca
Tujetsch

Protocol dalla 9. radunonza da vischnaunca

dils 11 da december 2024

allas 19.00 uras en Sala Cristalla

**Protocol nr. 9 dalla radunonza da vischnaunca dils 11 da december
2024 allas 19.00 uras entochen allas 20.13 uras,
en Sala Cristalla a Sedrun**

Presidi: Martin Cavegn (president communal)

Protocollista: Simona Giossi

Dumbravuschs: Martin Cavegn (1992), Georg Bearth

Presents: 23

Perstgisas: Ciril Deplazes, Nicole Giossi, Silvio Schmid, Maurin Cavegn

Tractandas

1. Avertura e beinvegni
2. Saramentaziun dil niev gerau d'economia e turissem, Pius Cavegn
3. Approbaziun dalla revisiun totala dalla nova lescha per la concessiun da terren en dretg da baghegiar
4. Approbaziun dalla fundaziun dalla "Corporaziun dallas vischnauncas concessiunarias dallas Ovras Electricas Reinanteriur SA" ed approbaziun dils statuts
5. Orientaziuns
6. Varia

1. Tractanda Avertura e constatziuns

Il president communal fa in cordial beinvegni a tuttas convischinas ed a tuts convischins tier la novavla radunonza da vischnaunca dil trienni 2023/2026. In'informaziun impurtonta ch'il president communal repeta ei igl agir futur dalla protocollaziun dils nums. Il num ed il prenum astgan sulettamein vegnir protocollai sche la persuna che pren il plaid dat ordavon il consentiment alla protocollista. Mo entras il consentiment dalla persuna singula vegn buca cunterfatg alla lescha dil schurmetg da datas.

Concretamein munta quei il suandont:

Ella pratica vegn ei ad esser aschia che la persuna che pren il plaid sto explicitamein pretender (avon ni suenter siu plaid) che siu num vegni numnaus cumpleinamein el protocol.

Senza igl explicit giavisch da nominaziun cumpleina dil plidader vegn sereferiu sil tal sco convischin resp. convischina.

2. Tractanda Saramentaziun dil niev gerau d'economia e turissem, Pius Cavegn

La saramentaziun dil niev gerau dil departement economia e turissem, Pius Cavegn (1960) da Sedrun, succeda tenor art. 48 dil regulativ da fatschenta dalla Vischnaunca Tujetsch. Pius Cavegn ha engirau avon Diu ch'el vegli ademplir tuttas obligaziuns da siu uffeci tenor siu meglier saver e puder.

3. Tractanda Approbaziun dalla revisiun totala dalla nova lescha per la concessiun da terren en dretg da baghegiar

Il president communal presenta la tractanda e declara che la fatschenta seigi vegnida turnada anavos alla radunonza da vischnaunca dils 21 d'uost 2024 per reponderaziun. Sinaquei ha ei dau duas sesidas cun dus representants dils convischins da Spinatscha sco era ina ulteriura tractaziun dalla lescha en suprastonza communal. Il president communal explichescha aunc ina gada ils artechels nua ch'ei ha dau midadas en cumparegliaziun cun il vegl regulativ. Ordavon explichescha el ils motivs daco che la suprastonza communal hagi la finala fatg neginas midadas visavi la lescha presentada ils 21 d'uost 2024. El messadi ein quels motivs descrets el detagl.

Debatta d'entrada

Negina debatta d'entrada ei giavischada.

Tractaziun

Tier la tractaziun han dus convischins priu il plaid:

In convischin menziunescha in pèr puncts el messadi ch'el va buca d'accord ed in ulteriur convischin fa attents che la lescha favoriseschi mo giuvna glieud e ch'ei seigi buc in bi sentiment d'haver negina influenza sigl agen possess – cunzun era cura ch'ins seigi pli vegls.

Convischin Renato Decurtins menziunescha ch'el vegni egl avegnir en sia funcziun professiunala a discusseglar ad interessents da serrar giu in contract per ina parcella en dretg da baghegiar sin basa dalla lescha proponida.

Silsuenter fa in convischin la proposta da strihar art. 16 litera 2 alinea c) "sch'il prezi da cumpra schai sur il prezi da commerci tenor schazetg ufficial" e da strihar egl art. 20 alinea f) la part "e quei per in prezi da vendita che astga buca survargar la valeta da commerci digl object da habitar tenor schazetg ufficial".

Votaziun

La radunonza da vischnaunca ha cun 4 vuschs gie, 17 vuschs na e 2 abstenziuns buc approbau la proposta dil convischin da strihar art. 16 litera 2 alinea c) e da strihar en gl'art. 20 alinea f) la part "e quei per in prezi da vendita che astga buca survargar la valeta da commerci digl object da habitar tenor schazetg ufficial."

La suprastonza communal fa la proposta d'approbar la revisiun totala dalla lescha per la concessiun da terren en dretg da baghegiar cun midar il text tier art. 27 alinea d) "Plinavon en ulteriurs cass, sche l'observaziun dallas cundiziuns legalas munta ina direzia sproporzionada." cun in text pli bein capeivel sco suonda: d) "En auters cass excepziunals da gronda direzia."

Votaziun

La radunonza da vischnaunca ha cun gronda maioritad approbau la revisiun totala dalla lescha per la concessiun da terren en dretg da baghegiar cun midar il text tier art. 27 alinea d) "Plinavon en ulteriurs cass, sche l'observaziun dallas cundiziuns legalas munta ina direzia sproporzionada." cun in text pli bein capeivel sco suonda: d) "En auters cass excepziunals da gronda direzia."

**4. Tractanda Approbaziun dalla fundaziun dalla "Corporaziun dallas
vischnauncas concessiunarias dallas Ovras Electricas Reinanteriur
SA" ed approbaziun dils statuts**

Il president communal presenta la tractanda e declara la fatschenta.

Debatta d'entrada

Negina debatta d'entrada ei giavischada.

Votaziun

La radunonza da vischnaunca ha approbau unanimamein la fundaziun dalla "Corporaziun dallas vischnauncas concessiunarias dallas Ovras Electricas Reinanteriur SA" e l'approbaziun dils statuts

5. Tractanda Orientaziuns

Da vart dalla suprastonza communal dad ei neginas orientaziuns.

6. Tractanda Varia

In convischin pren il plaid sut varia e fa attents sin la vernissascha dalla Pintga grammatica tuatschina che ha liug sonda, ils 14 da december 2024 allas 14.00 uras en Sala Cristalla.

Vinavon damonda in convischin daco che la suprastonza communal hagi buca dau suatientscha alla damonda dil Club da Slondas per saver menar atras la fiasta da "Rock the Mountain" en la Talina. Genau Daniel Schmid pren il plaid ed explichescha che la damonda seigi aunc buca vegnida tractada ed era aunc buca vegnida tschentada ufficialmein alla suprastonza communal. Ordavon havevi ei dau ina damonda a bucca. Las localitads dalla Talina seigien aunc buc vegnidas pridas giu dalla polizia da fiug. La sanaziun dalla Talina seigi gartegiada e tut seigi niev, sco per exempel las tualettas, la coluraziun dallas preits eav. Aschigleiti sco la damonda seigi avon maun, vegni la direcziun communal a tractar la damonda. Tenor genau Daniel Schmid dessi ei pil mument meglieras localitads per far partys – sco per exempel la tribuna dalla halla da scola.

Il president communal engrazia per la participaziun, giavischa in bien retuorn a casa e siara la radunonza da vischnaunca precis allas 20.13 uras.

Protocollista:
Simona Giossi

President communal:
Martin Cavegn